



**ՄԻՋԱԶԳԱՅԻՆ
ԿԱՌՈՒՅՑՆԵՐԻ ԿՈՂՄԻՑ
ՀՐԱՊԱՐԱԿՎԱԾ ՑՈՒՑԱՆԻՇՆԵՐԻ
ՈՒՍՈՒՄՆԱՍԻՐՈՒԹՅՈՒՆ**

ՀՀ ԳԵՆԴԵՐԱՅԻՆ ԱՆՀԱՎԱՍԱՐՈՒԹՅԱՆ ԻՆԴԵՔՍ - 2026

Հաշվետվություն Համաշխարհային տնտեսական համաժողովի կողմից
հրապարակված՝ Համաշխարհային գենդերային
անհավասարության զեկույցի (2026թ.) վերաբերյալ



ԲՈՎԱՆԴԱԿՈՒԹՅՈՒՆ

ՆԵՐԱԾՈՒԹՅՈՒՆ.....	1
1. ՀԱՄԱՇԽԱՐՀԱՅԻՆ ԳԵՆԴԵՐԱՅԻՆ ԱՆՀԱՎԱՍԱՐՈՒԹՅԱՆ ԻՆԴԵՔՍԻ ՀԱԿԻՐՃ ՆԿԱՐԱԳՐՈՒԹՅՈՒՆԸ	3
2. ԳԵՆԴԵՐԱՅԻՆ ԱՆՀԱՎԱՍԱՐՈՒԹՅՈՒՆՆ ԱՇԽԱՐՀՈՒՄ	5
2.1. Համաշխարհային միություններն ու արդյունքները.....	8
2.2. Գենդերային անհավասարությունն աշխարհի տարբեր հատվածներում.....	7
3. ԳԵՆԴԵՐԱՅԻՆ ԱՆՀԱՎԱՍԱՐՈՒԹՅՈՒՆԸ ՀԱՅԱՍՏԱՆՈՒՄ	9
4. ՀԱՅԱՍՏԱՆԻ ԳԵՆԴԵՐԱՅԻՆ ԱՆՀԱՎԱՍԱՐՈՒԹՅԱՆ ՊԱՏԿԵՐԸ ՏԱՐԱԾԱՇՐՋԱՆԱՅԻՆ ՀԱՄԱՏԵՔՍՈՒՄ	15
ԱՄՓՈՓՈՒՄ	17

ՆԵՐԱԾՈՒԹՅՈՒՆ

Հասարակության զարգացման ներկա փուլում գենդերային հավասարության ապահովումը հանդիսանում է սոցիալ-տնտեսական զարգացման կարևորագույն նախապայմաններից մեկը: Չնայած վերջին տասնամյակներում տարբեր երկրներում արձանագրված առաջընթացին, այնուամենայնիվ, կանանց և տղամարդկանց միջև հնարավորությունների, ռեսուրսների և որոշումների կայացման գործընթացներին մասնակցության անհավասարությունը շարունակում է պահպանվել: Այն դրսևորվում է կյանքի տարբեր ոլորտներում (տնտեսություն, կրթություն, առողջապահություն, քաղաքականություն և այլն)՝ սահմանափակելով հասարակության ներառական և կայուն զարգացումը:

Գենդերային անհավասարությունը ոչ միայն մարդու հիմնարար իրավունքների և հավասար հնարավորությունների ապահովման խնդիր է, այլև տնտեսական և սոցիալական արդյունավետության ապահովմանը խոչընդոտող կարևոր գործոն: Երբ հասարակության մի հատվածը լիարժեքորեն չի կարողանում իրացնել սեփական ներուժը, դրանից տուժում են ոչ միայն առանձին անհատները, այլև ամբողջ տնտեսությունը: Այդ պատճառով գենդերային հավասարության խթանումը միջազգային կազմակերպությունների, ազգային կառավարությունների և քաղաքացիական հասարակության կառույցների ուշադրության կենտրոնում գտնվող առաջնահերթ ուղղություններից է: Բազմաթիվ ուսումնասիրություններ փաստում են, որ գենդերային հավասարության բարձր մակարդակ ունեցող երկրները, որպես կանոն, առանձնանում են մարդկային կապիտալի ավելի արդյունավետ օգտագործմամբ, սոցիալական ավելի բարձր ներառականությամբ և զարգացման ավելի բարենպաստ ցուցանիշներով:

Նկատի ունենալով գենդերային անհավասարության հիմնախնդրի վերազգային բնույթը՝ պահանջվում են այնպիսի համընդհանուր ընդունելի մեթոդներ և գործիքակազմ, որոնք հնարավորություն կտան ոչ միայն գնահատել առանձին երկրներում առկա իրավիճակը, այլև հետևել ժամանակի ընթացքում տեղի ունեցող փոփոխություններին և իրականացնել միջերկրային համեմատություններ: Այդպիսի մեթոդաբանությունը և գործիքակազմը հնարավորություն կտան բացահայտել ինչպես արձանագրված առաջընթացը, այնպես էլ այն ոլորտները, որտեղ դեռևս պահպանվում են էական անհավասարություններ: Այս համատեքստում կարևոր նշանակություն ունեն հեղինակավոր միջազգային կազմակերպությունների վերլուծությունները: Գենդերային հավասարության ոլորտում ամենահեղինակավոր միջազգային հետազոտություններից է Համաշխարհային տնտեսական համաժողովի (World Economic Forum, այսուհետև՝ ՀՏՀ) կողմից 2006 թվականից ի վեր ամեն տարի հրապարակվող «Գենդերային անհավասարության համաշխարհային զեկույցը»

(Global Gender Gap Report): Զեկույցի առանցքում գտնվում է Համաշխարհային գենդերային անհավասարության ինդեքսը (այսուհետև՝ ՀԳԱ ինդեքս կամ Ինդեքս), որով գնահատվում է տարբեր երկրներում կանանց և տղամարդկանց միջև առկա ճեղքվածքը՝ տնտեսական մասնակցության, կրթության, առողջության և քաղաքական ներկայացվածության ոլորտներում: Զեկույցը հնարավորություն է տալիս համապարփակ պատկերացում կազմել ինչպես համաշխարհային, այնպես էլ տարածաշրջանային և ազգային մակարդակներում արձանագրված միտումների վերաբերյալ: Ինդեքսի գլխավոր առանձնահատկությունն այն է, որ այն կենտրոնանում է ոչ թե երկրների զարգացման ընդհանուր մակարդակի, այլ կանանց և տղամարդկանց միջև առկա տարբերությունների գնահատման վրա: Այդ հանգամանքը հնարավորություն է տալիս համեմատել տնտեսական և սոցիալական զարգացման տարբեր մակարդակով երկրները՝ բացահայտելով գենդերային հավասարության ապահովման գործում նրանց արձանագրած հաջողություններն ու առկա մարտահրավերները: Միաժամանակ, զեկույցի արդյունքները լայնորեն կիրառվում են քաղաքականության մշակման, ռազմավարական ծրագրերի նախապատրաստման և ոլորտային բարեփոխումների առաջնահերթությունների սահմանման գործընթացներում:

«Լույս» հիմնադրամը, կարևորելով ՀԳԱ ինդեքսի և դրա հիման վրա հրապարակվող ամենամյա զեկույցների տեղեկատվական և վերլուծական նշանակությունը, յուրաքանչյուր տարվա զեկույցի հրապարակումից հետո պատրաստում է դրա վերաբերյալ առանձին հաշվետվություն: Հաշվետվության առաջին բաժնում ներկայացվում են ՀԳԱ ինդեքսի բովանդակությունը, կառուցվածքը և հաշվարկման մեթոդաբանական հիմքերը: Այնուհետև ամփոփվում են համաշխարհային և տարածաշրջանային մակարդակներում արձանագրված հիմնական արդյունքներն ու միտումները: Հաջորդիվ վերլուծվում է Հայաստանին վերաբերող տեղեկատվությունը, ինչպես նաև իրականացվում են միջազգային և տարածաշրջանային համադրություններ: Հաշվետվությունն ավարտվում է դրա կարևոր արդյունքների ու եզրահանգումների ամփոփմամբ:

ՀՏՀ 2026 թվականի «Համաշխարհային գենդերային անհավասարության զեկույցը»¹ (այսուհետև՝ Զեկույց) հրապարակվել է օրերս: Զեկույցն ընդգրկում է 145 երկիր, որոնցից 97-ի համար ինդեքսն ամենամյա զեկույցների շարքի հրապարակումից ի վեր բոլոր տարիներին հաշվարկվել է:

Զեկույցում աշխարհը բաժանված է 8 տարածաշրջանային խմբերի («Եվրոպա», «Հյուսիսային Ամերիկա», «Լատինական Ամերիկա և Կարիբյան ավազանի երկրներ», «Կենտրոնական Ասիա», «Ենթասահարական Աֆրիկա»,

¹ Ամբողջական զեկույցը հասանելի է հետևյալ հղմամբ՝
https://reports.weforum.org/docs/WEF_GGGR_Report_2026.pdf:

«Արևելյան Ասիա և խաղաղօվկիանոսյան երկրներ», «Հարավային Ասիա», «Մերձավոր Արևելք և Հյուսիսային Աֆրիկա»): Հայաստանն ամենամյա զեկույցներում ընդգրկված է երկրորդ ամենամյա զեկույցից սկսած և 2024-ից ընդգրկված է «Կենտրոնական Ասիա» խմբում:

1. ՀԱՄԱՇԽԱՐՀԱՅԻՆ ԳԵՆԴԵՐԱՅԻՆ ԱՆՀԱՎԱՍԱՐՈՒԹՅԱՆ ԻՆԴԵՔՍԻ ՀԱԿԻՐՃ ՆԿԱՐԱԳՐՈՒԹՅՈՒՆԸ

Համաշխարհային գենդերային անհավասարության ինդեքսը համալիր (ագրեգացված) ցուցանիշ է, որի հաշվարկման համար օգտագործվում է 4 ենթաինդեքս:

1. Տնտեսական մասնակցություն և հնարավորություններ,
2. Կրթության ձեռքբերում,
3. Առողջություն և կյանքի տևողություն,
4. Քաղաքական մասնակցություն:

Գծապատկեր 1. Գենդերային անհավասարության ինդեքսի կառուցվածքը



«Տնտեսական մասնակցություն և հնարավորություններ» ենթաինդեքսը հաշվարկվում է հինգ ցուցիչների հիման վրա՝ «Աշխատուժի մասնակցության մակարդակ», «Միատեսակ աշխատանքների վարձատրությունների հավասարություն», «Վաստակած եկամուտ», «Օրենսդիր համակարգում, բարձրաստիճան և ղեկավար պաշտոններում զբաղվածություն» և «Մասնագիտական և տեխնիկական աշխատանքներում զբաղվածություն»: Ենթաինդեքսն արտացոլում է աշխատաշուկայում կանանց և տղամարդկանց ներգրավվածության, վարձատրության, եկամուտների ստացման, ինչպես նաև

ղեկավար և մասնագիտական պաշտոններում առաջխաղացման հնարավորությունների միջև առկա անհավասարության աստիճանը (գենդերային ճեղքվածքը):

«Կրթության ձեռքբերում» ենթաինդեքսի հաշվարկման հիմք են ծառայում չորս ցուցիչներ՝ «Գրագիտության մակարդակ», «Տարրական կրթական համակարգում ներգրավվածություն», «Միջնակարգ կրթական համակարգում ներգրավվածություն» և «Բարձրագույն կրթական համակարգում ներգրավվածություն»: Ենթաինդեքսը բնութագրում է կանանց և տղամարդկանց միջև կրթության մատչելիության տարբերության աստիճանը՝ գենդերային ճեղքվածքը:

«Առողջություն և կյանքի տևողություն» ենթաինդեքսի հաշվարկման համար օգտագործվում է երկու ցուցիչ՝ «Երկու սեռերի նորածինների թվաքանակների հարաբերակցություն» և «Առողջ կյանքի սպասվող տևողություն»: Վերջինս ներկայացնում է կանանց և տղամարդկանց առողջ կյանքի միջին տևողությունների քանակական հարաբերակցությունը:

«Քաղաքական մասնակցություն» ենթաինդեքսը նախատեսված է քաղաքական որոշումների ընդունման բարձրագույն մակարդակներում կանանց և տղամարդկանց ներկայացվածության միջև առկա անհավասարության գնահատման համար: Դրա հաշվարկման համար օգտագործվում է երեք ցուցիչ՝ «Կանայք խորհրդարանում», «Կանայք կառավարությունում» և «Պետության ղեկավարի պաշտոնում վերջին հիստուն տարում կանանց և տղամարդկանց կողմից պաշտոնավարելու տարիների հարաբերակցություն»:

ՀԳԱ ինդեքսը հաշվարկելիս՝ առաջնորդվում են հետևյալ սկզբունքներով.

1. Երկրների դասակարգումը կատարվում է ոչ թե դրանց զարգացման մակարդակի, այլ գենդերային ճեղքվածքի հիման վրա:

2. Երկրների գնահատումն իրականացվում է բացառապես այնպիսի ելքային ցուցանիշների միջոցով, որոնք համադրելի են բոլոր երկրների համար և կախված չեն տվյալ երկրի քաղաքական, իրավական, մշակութային կամ սոցիալական առանձնահատկություններից:

3. Ինդեքսի աճը վկայում է գենդերային ճեղքվածքի կրճատման մասին: Ի դեպ, գենդերային ճեղքվածք է համարվում նաև այն իրավիճակը, երբ կանայք են տղամարդկանցից ավելի նախընտրելի պայմաններում գտնվում:

Ինդեքսի հաշվարկումն իրականացվում է չորս հաջորդական քայլերով.

Քայլ 1. Բոլոր սկզբնական տվյալները ներկայացվում են «կին/տղամարդ» թվային հարաբերակցությունների տեսքով:

Քայլ 2. Ստացված հարաբերակցություններից յուրաքանչյուրի համար սահմանվում է գենդերային հավասարության առավելագույն հնարավոր արժեքը: Գրեթե բոլոր հարաբերակցությունների համար այդ արժեքը հավասար է 1-ի: Բացառություն են կազմում միայն երկու հարաբերակցություններ. նորածինների թվաքանակների սեռային հարաբերակցության դեպքում առավելագույն արժեքը 0.944 է, իսկ առողջ կյանքի սպասվող տևողության հարաբերակցության դեպքում՝ 1.06:

Քայլ 3. Հաշվարկվում են ինդեքսի չորս ենթաինդեքսները, որոնք ներկայացնում են դրանց հիմքում ընկած ցուցիչների կշռված միջինները: Ենթաինդեքսների արժեքները պատկանում են $[0;1]$ միջակայքին. 1-ը բնութագրում է կանանց և տղամարդկանց միջև լիարժեք հավասարությունը, իսկ 0-ն՝ լիակատար անհավասարությունը:

Քայլ 4. Հաշվարկվում է ՀԳԱ ինդեքսը՝ որպես չորս ենթաինդեքսների միջին թվաքանական $[0;1]$ միջակայքում:

ՀԳԱ ինդեքսը շատ հաճախ ներկայացվում է տոկոսային արտահայտությամբ: Այդ դեպքում ինդեքսի արժեքը բազմապատկվում է 100-ով, և դրա հնարավոր արժեքների բազմությունը տեղափոխվում է $[0;100]$ միջակայք: Նման ներկայացման ձևը հնարավորություն է տալիս ինդեքսը մեկնաբանել որպես տվյալ երկրում գենդերային անհավասարության հաղթահարման աստիճան: Օրինակ, եթե երկրի ՀԳԱ ինդեքսը 0.743 է, ապա դա նշանակում է, որ երկրում գենդերային անհավասարության հաղթահարման մակարդակը 74.3 տոկոս է, այսինքն՝ լիակատար գենդերային հավասարության հասնելու համար դեռևս անհրաժեշտ է կրճատել մնացած 25.7-տոկոսանոց ճեղքվածքը:

2. ԳԵՆԴԵՐԱՅԻՆ ԱՆՀԱՎԱՍԱՐՈՒԹՅՈՒՆՆ ԱՇԽԱՐՀՈՒՄ²

Համաշխարհային տնտեսական համաժողովի 2026 թվականի զեկույցն ընդգրկում է 145 երկրների տվյալներ, իսկ 20-ամյա անփոփոխ ընտրանքը ներառում է 97 երկիր (որոնց համար ինդեքսը հաշվարկվել է 2006-2026թթ. անընդմեջ):

² Նախորդ տարիների որոշ տվյալներ Ձեկույցում վերանայվել են: Սույն բաժնում համեմատությունների համար օգտագործված են թարմացված՝ զեկույցի ինտերնետային էջում գետնեղված տվյալների բազայի (և ոչ թե 2025թ. զեկույցի) տվյալները:

2.1. Համաշխարհային միություններն ու արդյունքները

2026 թվականին համաշխարհային գենդերային ճեղքվածքը փակված է 69.2%-ով (145 երկրների համար), իսկ 20-ամյա անփոփոխ ընտրանքի (97 երկրների) համար ցուցանիշը հասել է պատմական առավելագույնին՝ 69.4%: Նախորդ՝ 2025 թվականի համեմատ (68.8%) արձանագրվել է համաշխարհային ինդեքսի 0.4 տոկոսային կետով աճ:

Անցած 20 տարիների (2006-2026թթ.) կտրվածքով համաշխարհային գենդերային ճեղքվածքը կրճատվել է ընդամենը 5.2 տոկոսային կետով (2006թ. 64.2%-ից հասնելով 69.4%-ի):

Նշվում է, որ առաջընթացի ներկայիս դանդաղ տեմպերի պահպանման պարագայում համաշխարհային մակարդակով լիակատար գենդերային հավասարության հասնելու համար աշխարհից կպահանջվի ևս 120 տարի:

Ըստ գենդերային անհավասարության ինդեքսի կազմված համաշխարհային վարկանիշային աղյուսակը 2026թ. ևս, 17 տարի անընդմեջ, գլխավորում է Իսլանդիան՝ 93.0% արդյունքով (միակ երկիրն է, որը հաղթահարել է 90%-ի շեմը): Առաջատար եռյակը նախորդ տարվա համեմատ չի փոխվել. 2-րդ հորիզոնականը (<ԳԱ 0.872 ինդեքսով) զբաղեցնում է Ֆինլանդիան, 3-րդը Նորվեգիան է՝ 0.857 ինդեքսով: Լավագույն տասնյակում ընդգրկված են նաև Նամիբիան (4-րդ հորիզոնական, <ԳԱ ինդեքս՝ 0.845), Մեծ Բրիտանիան (5-րդ հորիզոնական, <ԳԱ ինդեքս՝ 0.842), Նոր Զելանդիան (6-րդ հորիզոնական, <ԳԱ ինդեքս՝ 0.828), Շվեդիան (7-րդ հորիզոնական, <ԳԱ ինդեքս՝ 0.823), Ավստրալիան (8-րդ հորիզոնական, <ԳԱ ինդեքս՝ 0.819), Գերմանիան (9-րդ հորիզոնական, <ԳԱ ինդեքս՝ 0.817) և Իռլանդիան (10-րդ հորիզոնական, <ԳԱ ինդեքս՝ 0.814): Ավստրալիան առաջատար տասնյակում «նորեկ» է:

Վարկանիշային աղյուսակի հետնապահներն են Պակիստանը (143-րդ հորիզոնական, 0.595 միավոր), Իրանը (144-րդ հորիզոնական, 0.585 միավոր) և Զադը (145-րդ հորիզոնական, 0.578 միավոր):

Ըստ <ԳԱ ինդեքսի 4 ենթաինդեքսների՝ արձանագրվել են հետևյալ գլոբալ արդյունքները.

- **«Կրթության ձեռքբերում»** ենթաինդեքս

Գլոբալ ճեղքվածքը փակված է 96.9%-ով (2025թ. համեմատ աճել է 1.8 տոկոսային կետով, իսկ 2006թ. ի վեր՝ 5.5 տոկոսային կետով): Այս ենթաինդեքսով լիակատար հավասարության հասնելու համար կպահանջվի ընդամենը 8 տարի:

• **«Առողջություն և կյանքի տևողություն»** ենթաինդեքս

Գլոբալ ճեղքվածքը փակված է 96.2%-ով: Սա միակ ենթաինդեքսն է, որի արժեքը նույնն է, ինչ 2006-ին:

• **«Տնտեսական մասնակցություն և հնարավորություններ»** ենթաինդեքս

Այս ենթաինդեքսի գծով գլոբալ ճեղքվածքը փակված է ընդամենը 61.7%-ով: Տնտեսական ոլորտում լիակատար գենդերային հավասարության հասնելու համար կպահանջվի ևս 129 տարի:

• **«Քաղաքական մասնակցություն»** ենթաինդեքս

Սա ամենացածր ցուցանիշով ենթաինդեքսն է՝ փակված է ճեղքվածքի ընդամենը 22.1%-ը: 2025թ. (22.5%) համեմատ արձանագրվել է 0.4 տոկոսային կետի նահանջ, ինչը ցույց է տալիս, որ քաղաքական որոշումների կայացման բարձրագույն օղակներում կանանց ներգրավվածությունը մնում է ցածր մակարդակի վրա:

2.2. Գենդերային անհավասարությունն աշխարհի տարբեր հատվածներում

Ինչպես նշվեց, Զեկույցում աշխարհի 145 երկրները խմբավորված են 8 տարածաշրջանային խմբերում: Տարածաշրջանների միջև արձանագրվել են գենդերային հավասարության հասնելու ժամկետների և առաջընթացի տեմպերի բավական էական տարբերություններ:

1. Եվրոպա (75.7%) – ամենամեծ տարածաշրջանային խումբն է՝ ներառում է 40 երկիր: Վերականգնել է ՀԳԱ ինդեքսի գծով առաջատար տարածաշրջանի տիտղոսն ի հաշիվ նրա, որ ինդեքսը 2025թ. համեմատ աճել է 0.6 տոկոսային կետով, իսկ 2006թ. ի վեր՝ 7.0 տոկոսային կետով: Լիակատար գենդերային հավասարության հասնելու ժամկետը 70 տարի է: Տարածաշրջանը համաշխարհային առաջատարն է քաղաքական մասնակցության ենթաինդեքսի առումով (37.0%): Կրթության (99.5%) և առողջապահության (96.9%) ոլորտներում պահպանվում են բարձր ցուցանիշներ, իսկ տնտեսական մասնակցության ճեղքվածքը փակված է 69.5%-ով: Տարածաշրջանի 7 երկիր գտնվում է համաշխարհային վարկանիշային աղյուսակի լավագույն տասնյակում, և միայն մի երկիր՝ Թուրքիան ընդգրկված չէ առաջին հարյուրյակում: Ի դեպ, տարածաշրջանը գենդերային հավասարության առումով ամենաանհամասեռն է՝ առաջատար Իսլանդիայի և հետնապահ Թուրքիայի ՀԳԱ ինդեքսների տարբերությունը 28.1 տոկոսային կետ է (93.0%-64.9%):

2. Հյուսիսային Ամերիկա (75.2%) – այս տարածաշրջանում ընդգրկված է ընդամենը երկու երկիր՝ ԱՄՆ-ն և Կանադան: Տարածաշրջանը համաշխարհային առաջատարն է տնտեսական մասնակցության (77.1%) և կրթական ձեռքբերումների (100.0%) ենթաինդեքսներով: Իսկ քաղաքական մասնակցության ոլորտում արժանագրվել է 3.3 տոկոսային կետի նահանջ (հասնելով 26.4%-ի)՝ կառավարությունում և խորհրդարանում կանանց ներկայացվածության նվազման պատճառով: Լիակատար գենդերային հավասարության հասնելու ժամկետը 108 տարի է:

3. Լատինական Ամերիկա և Կարիբյան ավազան (74.5%) - տարածաշրջանն առաջատարն է առողջապահության ենթաինդեքսով (97.7%) և ունի 2-րդ բարձր ցուցանիշը քաղաքական մասնակցության ոլորտում (34.2%): **«Կրթության ձեռքբերում»** ենթաինդեքսը 99.6% է, իսկ **«Տնտեսական մասնակցություն և հնարավորություններ»** ենթաինդեքսը՝ 66.4%: Տարածաշրջանի բոլոր 22 երկրները գտնվում են վարկանիշային աղյուսակի առաջին հարյուրյակում: Ի դեպ, այս տարածաշրջանը գրանցել է աշխարհում ամենամեծ 20-ամյա առաջընթացը (+8.6 տոկոսային կետ): Գենդերային հավասարության հասնելու ժամկետն աշխարհում ամենակարճն է՝ 60 տարի:

4. Արևելյան Ասիա և Խաղաղօվկիանոսյան երկրներ (70.3%) – 19 երկիր ընդգրկող այս տարածաշրջանն առաջին անգամ հատել է 70%-ի շեմը: Տարածաշրջանի 10 երկիր ընդգրկված է համաշխարհային վարկանիշային աղյուսակի առաջին հարյուրյակում, դրանցից երկուսը գտնվում են առաջատար տասնյակում: Տնտեսական մասնակցության ենթաինդեքսով (71.4%) տարածաշրջանը 2-րդն է աշխարհում, իսկ կրթության ոլորտում գենդերային հավասարության հասել է 98.5%-ով: Քաղաքական մասնակցության ցուցանիշը ցածր է (15.5%), իսկ **«Առողջություն և կյանքի տևողություն»** ենթաինդեքսի արժեքը 95.6% է: Տարածաշրջանում լիակատար գենդերային հավասարության հասնելու համար կպահանջվի 144 տարի:

5. Կենտրոնական Ասիա (70.0%) - ունի լիակատար գենդերային հավասարության հասնելու ամենաերկար կանխատեսվող ժամկետն աշխարհում՝ 202 տարի: Տարածաշրջանի 7 երկրներից 5-ն ընդգրկված են համաշխարհային առաջին հարյուրյակում, իսկ երկրների ինդեքսների միջև տարբերությունը չի գերազանցում 10 տոկոսային կետը: Չնայած Կենտրոնական Ասիան ունի բավական բարձր ցուցանիշներ կրթության (99.3%), առողջապահության (97.3%) և տնտեսական մասնակցության (71.0%) ոլորտներում, տարածաշրջանի ընդհանուր առաջընթացն էականորեն զսպվում է քաղաքական մասնակցության ենթաինդեքսի ցածր մակարդակի պատճառով (ընդամենը 12.6%): Հայաստանն ընդգրկված է այս տարածաշրջանային խմբում:

6. Ենթասահարական Աֆրիկա (68.8%) - տարածաշրջանը ներառում է 34 երկիր, որոնցից 19-ը վարկանիշային աղյուսակի առաջին հարյուրյակում են (իսկ

դրանցից մեկը՝ առաջատար տասնյակում): Բարելավման 20-ամյա միջին տարեկան տեմպի պահպանման դեպքում տարածաշրջանի լիակատար գենդերային հավասարության հասնելու համար կպահանջվի 102 տարի: Տարածաշրջանն աչքի է ընկնում երկրների միջև ամենամեծ անհամասեռությամբ. Նամիբիան 84.5% ցուցանիշով 4-րդն է աշխարհում, մինչդեռ Չադը եզրափակում է համաշխարհային ցանկը (57.8%): Տարածաշրջանի կրթական ձեռքբերումների ցուցանիշն աշխարհում ամենացածրն է՝ 89.5%:


7. Հարավային Ասիա (64.5%) – 7 երկիր ներառող այս տարածաշրջանն ունի տնտեսական մասնակցության ամենացածր ցուցանիշն աշխարհում (ընդամենը 40.9%): Տարածաշրջանի միայն մեկ երկիր է գտնվում վարկանիշային աղյուսակի առաջին հարյուրյակում: Այս տարածաշրջանի **«Կրթության ձեռքբերում»** ենթաինդեքսն արժանագրել է ամենամեծ 20-ամյա աճը (+15.0 տոկոսային կետ՝ հասնելով 95.9%-ի), մինչդեռ, քաղաքական մասնակցության ոլորտում առաջընթացն ամենադանդաղն է (+3.5 տոկոսային կետ՝ հասնելով 25.4%-ի): Լիակատար գենդերային հավասարության հասնելու ժամկետը 149 տարի է:

8. Մերձավոր Արևելք և Հյուսիսային Աֆրիկա (62.5%) - 14 երկիր ներառող այս տարածաշրջանից ընդամենը երկու երկիր է գտնվում վարկանիշային աղյուսակի առաջին հարյուրյակում: Գենդերային հավասարության հասնելու ժամկետը 182 տարի է: Տարածաշրջանը քաղաքական մասնակցության գծով ունի աշխարհում ամենացածր ցուցանիշը (ընդամենը 11.5%), իսկ տնտեսական մասնակցության ճեղքվածքը փակված է ընդամենը 44.8%-ով:

3. ԳԵՆԴԵՐԱՅԻՆ ԱՆՀԱՎԱՍԱՐՈՒԹՅՈՒՆԸ ՀԱՅԱՍՏԱՆՈՒՄ

Համաձայն 2026 թվականի զեկույցի՝ Հայաստանը գենդերային անհավասարության 0.731 (73.1%) ինդեքսով 145 երկրների շարքում զբաղեցնում է 58-րդ հորիզոնականը: Նախորդ՝ 2025 թվականի համեմատ Հայաստանի ՀԳԱ ինդեքսն անփոփոխ է մնացել, իսկ վարկանիշային դիրքը բարելավվել է 1 հորիզոնականով: (Գծապատկեր 2):

Գծապատկեր 2. Գենդերային անհավասարության ինդեքսը Հայաստանում և ՀՀ դիրքը՝ ըստ ինդեքսի, 2007-2026թթ.³⁴




Գծապատկերից երևում է, որ 2007-ից ի վեր Հայաստանի ՀԳԱ ինդեքսն աճել է 6.6 տոկոսային կետով: Ի դեպ, ինդեքսը 2015-ից ի վեր նվազել է միայն 2021-ին՝ 1.1 տոկոսային կետով, իսկ 2024-ին և 2026-ին արձանագրվել է աճի դադար:

Գծապատկեր 3-ից երևում է, որ Հայաստանի ՀԳԱ-ն 3.9 տոկոսային կետով գերազանցում է համաշխարհային միջինը (69.2%): Այնուամենայնիվ, հարկ է նշել, որ այդ տարբերությունը տարեցտարի կրճատվում է:

³ Նախկինում՝ տվյալ տարում հրապարակվող զեկույցը հիմնվում էր նախորդ տարվա տվյալների վրա: Այս տարվա զեկույցի տվյալները վերաբերում են հենց այս տարվան: Համապատասխանաբար, փոխվել է նաև զեկույցի ինտերնետային էջում գետեղված տվյալների բազայի բովանդակությունը: Այս և հետագա գծապատկերներում ու աղյուսակներում ներկայացված են տվյալների բազայում համապատասխան տարվան վերաբերող տվյալները:

⁴ Գծապատկերում 2019թ. տվյալները բացակայում են, քանի որ 2019-ի դեկտեմբերին լույս տեսած 14-րդ զեկույցը պաշտոնապես անվանվել է «Համաշխարհային գենդերային անհավասարության զեկույց-2020», մինչդեռ նախորդ՝ 2018թ. հրապարակված 13-րդ զեկույցը կոչվում էր «Համաշխարհային գենդերային անհավասարության զեկույց-2018»: Փաստացի՝ 21 տարվա ընթացքում հրապարակվել է 20 զեկույց:

Գծապատկեր 3. ՀՀ գենդերային անհավասարության ինդեքսը, ենթաինդեքսները և աշխարհի միջին գնահատականները, 2026թ.



Հայաստանի բոլոր չորս ենթաինդեքսները բարձր են դրանց համաշխարհային միջին մակարդակներից: Ըստ ենթաինդեքսների՝ Հայաստանը գենդերային անհավասարությունը հաղթահարել է.

- **«Տնտեսական մասնակցություն և հնարավորություններ»** ենթաինդեքսի գծով՝ 65.2%-ով (ենթաինդեքսի համաշխարհային միջինը 61.7% է):
- **«Կրթության ձեռքբերում»** ենթաինդեքսի գծով՝ 98.2%-ով (ենթաինդեքսի համաշխարհային միջինը 96.9% է):
- **«Առողջություն և կյանքի տևողություն»** ենթաինդեքսի գծով՝ 96.5%-ով (ենթաինդեքսի համաշխարհային միջինը՝ 96.2%):
- **«Քաղաքական մասնակցություն»** ենթաինդեքսի գծով՝ 32.4%-ով (ենթաինդեքսի համաշխարհային միջինը՝ 22.1%):

Աղյուսակ 1-ում ներկայացված է առավել ընդգրկուն տեղեկատվություն Հայաստանում նախորդ տարվա համեմատ գենդերային անհավասարության հաղթահարման գործընթացի վերաբերյալ:

**Աղյուսակ 1. Հայաստանի գենդերային անհավասարության ենթահնդեքսները
և դրանց հաշվարկում օգտագործվող ցուցանիշները, 2025-2026թթ.՝)**

Ենթահնդեքս • Ցուցիչ	Տարի	Դիմք	Հնդեքս	Համաշխարհային միջին	Կին	Տղամարդ
Տնտեսական մասնակցություն և հնարավորություններ	2025	91	66.8%	61.0%		
	2026	110	65.2%	61.7%		
• Աշխատուժի մասնակցության մակարդակ	2025	89	74.9%		56.9%	75.9%
	2026	92	74.9%		56.9%	75.9%
• Միաբնակ աշխատանքների վարձատրությունների հավասարություն, 1-7 (լավագույն)	2025	49	69.4%			
	2026	57	67.0%			
• Վաստակած եկամուտ, ԱՄՆ դոլար	2025	106	55.5%		14,010	25,260
	2026	119	51.9%		14,040	27,060
• Օրենսդիր համակարգում, բարձրաստիճան և ղեկավար պաշտոններում զբաղվածություն	2025	91	40.3%		28.7%	71.3%
	2026	96	40.3%		28.7%	71.3%
• Մասնագիտական և տեխնիկական աշխատանքներում զբաղվածություն	2025	1	100%		35.8%	64.2%
	2026	1	100%		35.8%	64.2%
Կրթության ձեռքբերում	2025	99	98.0%	95.1%		
	2026	99	98.2%	96.9%		
• Գրագիտության մակարդակ	2025	1	100%		99.7%	99.9%
	2026	1	100%		99.8%	99.9%
• Տարրական կրթական համակարգում ներգրավվածություն	2025	117	96.9%		94.9%	98.0%
	2026	120	96.9%		94.9%	98.0%
• Միջնակարգ կրթական համակարգում ներգրավվածություն	2025	114	97.5%		88.2%	90.5%
	2026	110	98.3%		90.1%	91.7%
• Բարձրագույն կրթական համակարգում ներգրավվածություն	2025	1	100%		48.8%	63.8%
	2026	1	100%		44.3%	61.3%
Առողջություն և կյանքի տևողություն	2025	122	96.1%	96.2%		
	2026	95	96.5%	96.2%		
• Նորածինների հարաբերակցություն՝ ըստ սեռի	2025	145	91.7%			
	2026	142	92.3%			
• Առողջ կյանքի տևողության տարիներ	2025	1	106.0%			
	2026	1	106.0%			
Քաղաքական մասնակցություն	2025	48	31.6%	22.9%		
	2026	42	32.4%	22.1%		
• Կանայք խորհրդարանում	2025	32	62.1%		38.3%	61.7%
	2026	27	64.6%		39.3%	60.7%
• Կանայք կառավարությունում	2025	38	50.0%		33.3%	66.7%
	2026	31	50.0%		33.3%	66.7%
• Պետության կին/տղամարդ ղեկավարների իշխանության տարիներ (վերջին 50 տարիների կտրվածքով)	2025	81	0.0%		0	50
	2026	82	0.0%		0	50

*) Ցուցանիշի արժեքը նշված է **կանաչով**, եթե 2026 թվականին 2025-ի համեմատ գրանցվել է բարելավում, **կարմիրով**՝ վատթարացման դեպքում, և **դեղինով**, եթե այն մնացել է անփոփոխ:

Աղյուսակից երևում է, որ **2026-ին, ինչպես և նախորդ տարի, առավել կարևոր ցուցանիշների մասով վատթարացում է արձանագրվել:**

«Տնտեսական մասնակցություն և հնարավորություններ» ենթաինդեքսի գծով այս տարի ևս (ինչպես և նախորդ տարի) արձանագրվել է բավական լուրջ նահանջ. նախորդ տարվա համեմատ ենթաինդեքսը նվազել է 1.6 տոկոսային կետով, իսկ դրա գծով վարկանիշային դիրքը վատթարացել է 19 հորիզոնականով և Հայաստանը դուրս է մնացել նույնիսկ առաջին հարյուրյակից՝ զբաղեցնելով 110-րդ հորիզոնականը: Նախորդ տարվա համեմատ վատթարացումը հատկապես շոշափելի է «Վաստակած եկամուտ» և «Միատեսակ աշխատանքների վարձատրությունների հավասարություն» ցուցիչների գծով՝ համապատասխանաբար 3.6 տոկոսային կետով (վարկանիշային դիրքի նահանջը՝ 13 հորիզոնական) և 2.4 տոկոսային կետով (վարկանիշային դիրքի նահանջը՝ 8 հորիզոնական): Ի դեպ, վերոհիշյալ երկու ցուցիչներից առաջինը նվազում է երրորդ տարին անընդմեջ և 2026-ի արժեքը 2023-ինից ցածր է 10.8 տոկոսային կետով, իսկ վարկանիշային դիրքը վատթարացել է 36 հորիզոնականով: Երկրորդ ցուցիչը նվազում է չորս տարի շարունակ. 2022-ի համեմատ ցուցիչի արժեքը 8.9 տոկոսային կետով ցածր է, իսկ վարկանիշային դիրքը վատթարացել է 42 հորիզոնականով:

Հիշեցնենք, որ երրորդ տարին է, ինչ «Տնտեսական մասնակցություն և հնարավորություններ» ենթաինդեքսը շարունակաբար նվազում է. ընդհանուր անկումը կազմում է 6.4 տոկոսային կետ՝ 2023թ. 71.6%-ից նվազելով մինչև 65.2%, իսկ վարկանիշային դիրքի վատթարացումը 58 հորիզոնական է: Սա վկայում է Հայաստանի աշխատաշուկայում խորացող գենդերային խտրականության և այս ուղղությամբ կառավարության քաղաքականության անարդյունավետության մասին:

«Կրթության ձեռքբերում» ենթաինդեքսը նախորդ տարվա միանգամից 1.1 տոկոսային կետով նվազումից հետո փոքր-ինչ՝ 0.2 տոկոսային կետով, բարելավվել է և կազմել 98.2%: Աճն ապահովվել է շնորհիվ միջնակարգ կրթական համակարգում ներգրավվածության ցուցիչի՝ այն 2025-ի 97.5%-ից 2026-ին դարձել է 98.3%: Այնուամենայնիվ, ենթաինդեքսի աճը չի բավականացրել, որպեսզի դրա գծով վարկանիշային դիրքի առումով ևս առաջընթաց գրանցվի. վարկանիշային դիրքը մնացել է անփոփոխ՝ 99-րդ հորիզոնական: Ի դեպ, ենթաինդեքսի 2026թ. արժեքը բոլոր տարիների արժեքներից փոքր չէ միայն 2025-ի արժեքից: Իսկ մինչև այդ այս ենթաինդեքսը մշտապես շատ բարձր է եղել (7 անգամ 100-տոկոսանոց արդյունք, ևս 7 տարիներին՝ 99.9%, երկու անգամ՝ 99.8% և միայն 2024-ին՝ 99.1%): Այս հանգամանքը վկայում է, որ կրթության ոլորտում ևս առկա են պետական քաղաքականության ձախողումներ:

Հատկանշական է, որ չափազանց մեծ անհամապատասխանություն կա կանանց կրթական/մասնագիտական ներուժի և դրա տնտեսական իրացման

(ռեալիզացիայի) միջև: Երկու կարևորագույն ցուցիչների՝ «բարձրագույն կրթության համակարգում ընդգրկվածություն» (**«Կրթության ձեռքբերում»**) ենթաինդեքսի ցուցիչ) և «մասնագիտական և տեխնիկական աշխատանքներում զբաղվածություն» (**«Տնտեսական մասնակցություն և հնարավորություններ»**) ենթաինդեքսի ցուցիչ) գծով Հայաստանը զբաղեցնում է առաջին հորիզոնականն աշխարհում: **Մինչդեռ եկամուտների բաշխման և ղեկավարման օղակներում կանանց ներգրավվածության առումով պատկերը չափազանց մտահոգիչ է:** «Վաստակած եկամուտ» ցուցիչով Հայաստանը 119-րդն է աշխարհում (կանանց տարեկան եկամուտը 14,040 PPP դոլար է, մինչդեռ տղամարդկանցը գրեթե կրկնակի ավելի է՝ 27,060 PPP դոլար): Համաձայն «օրենսդիր համակարգում, բարձրաստիճան և ղեկավար պաշտոններում զբաղվածություն» ցուցիչի՝ բարձրաստիճան և ղեկավար պաշտոնների ընդամենը 28.7%-ն են կանայք զբաղեցնում, այն էլ՝ հիմնականում շնորհիվ խորհրդարանի պատգամավորների համար օրենսդրորեն ամրագրված սեռային քվոտավորման: Սա վկայում է, այսպես կոչված, «ապակյա առաստաղի» (glass ceiling) խնդրի առկայության մասին. բարձրագույն կրթություն և մասնագիտական որակավորում ունեցող կանայք բախվում են անտեսանելի ու անհաղթահարելի կառուցվածքային և համակարգային խոչընդոտների, որոնք խանգարում են նրանց ծառայողական առաջխաղացմանը՝ չնայած նրանց բարձրակարգ կրթությանը, որակավորմանը և մասնագիտական պատրաստվածությանը: Իսկ դա, բնականաբար, երկրի մասշտաբով խորացնում է մարդկային կապիտալի թերօգտագործման խնդիրը:

2026-ին **«Առողջություն և կյանքի տևողություն»** ենթաինդեքսի գծով առկա է որոշակի բարելավում. այն կազմել է 96.5%՝ նախորդ տարվա համեմատ աճելով 0.4 տոկոսային կետով: Այս տարի ևս բարելավումը պայմանավորված է **«Նորածինների հարաբերակցություն՝ ըստ սեռի»** ցուցիչի աճով՝ 0.6 տոկոսային կետով: Ի դեպ, այս ցուցիչով Հայաստանը շարունակում է մնալ ամենավատերից մեկն աշխարհում՝ 142-րդը 145 երկրների շարքում: Սա վկայում է այն մասին, որ Հայաստանում սեռով պայմանավորված հղիության արհեստական ընդհատումների խնդիրը լուրջ մարտահրավեր է հանդիսանում:

«Քաղաքական մասնակցություն» ենթաինդեքսը նախորդ տարվա համեմատ աճել է 0.8 տոկոսային կետով: **Առաջընթացը պայմանավորված է նրանով, որ խորհրդարանում մեկով ավելացել է կին պատգամավորների թիվը:**

Այսպիսով, վերլուծությունը ցույց է տալիս, որ **«Տնտեսական մասնակցություն և հնարավորություններ»** ենթաինդեքսի գծով արձանագրված բավական լուրջ նահանջի պայմաններում ՀԳԱ ինդեքսը նախորդ տարվա համեմատ մնացել է անփոփոխ այն պատճառով, որ աճել են մյուս երեք (ոչ տնտեսական բնույթի)

4. ՀԱՅԱՍՏԱՆԻ ԳԵՂԴԵՐԱՅԻՆ ԱՆՀԱՎԱՍԱՐՈՒԹՅԱՆ ՊԱՏԿԵՐԸ ՏԱՐԱԾԱՇՐՋԱՆԱՅԻՆ ՀԱՄԱՏԵՔՍՈՒՄ

Զեկույցում Հայաստանն ընդգրկված է «Կենտրոնական Ասիա» տարածաշրջանային խմբում: 2026թ. տվյալներով՝ Հայաստանը շարունակում է գլխավորել տարածաշրջանային վարկանիշային աղյուսակը (Աղյուսակ 3):

Աղյուսակ 2. ՀԳԱ ինդեքսը «Կենտրոնական Ասիա» տարածաշրջանում, 2025-2026թթ.^{*)}

Երկիր	2025 թվական			2026 թվական		
	Դիրքը տարածաշրջանում	Դիրքն աշխարհում	Ինդեքս, %	Դիրքը տարածաշրջանում	Դիրքն աշխարհում	Ինդեքս, %
Հայաստան	1	59	73.1	1	58	73.1
Վրաստան	2	63	72.9	2	60	72.7
Ղրղզստան	4	95	69.6	3	88	70.4
Ղազախստան	3	92	69.8	4	95	70.0
Ադրբեջան	5	100	68.8	5	98	69.7
Ուզբեկստան	6	110	67.8	6	110	68.2
Տաջիկստան	7	129	64.6	7	136	63.8

*) Ցուցանիշի արժեքը նշված է կանաչով, եթե 2026 թվականին 2025-ի համեմատ գրանցվել է բարելավում, կարմիրով՝ վատթարացման դեպքում, և դեղինով, եթե այն մնացել է անփոփոխ:

Նախկինում Հայաստանի խմբում ներառված էին Մոլդովան և Բելառուսը, որոնք ինդեքսի առումով ավանդաբար գերազանցել են Հայաստանին: **2024 թվականից այդ երկրներն ընդգրկված են այլ տարածաշրջանային խմբում, և դրանով պայմանավորված Հայաստանը երեք տարի անընդմեջ դարձել է տարածաշրջանային վարկանիշային աղյուսակի առաջատարը:**

Զեկույցում ներառված են Եվրասիական տնտեսական միության (ԵԱՏՄ) անդամ չորս երկիր⁵, որոնց թվում Հայաստանը ՀԳԱ ինդեքսով և աշխարհում զբաղեցրած դիրքով զիջում է միայն 74.0% ՀԳԱ ինդեքս ունեցող և համաշխարհային վարկանիշային աղյուսակի 52-րդ հորիզոնականը զբաղեցնող

⁵ Ռուսաստանի Դաշնությունը Զեկույցում ներառված չէ:

Բեկառուին: Ի դեպ, ԵԱՏՄ երկրներից միայն Հայաստանի ՀԳԱ ինդեքսը նախորդ տարվա համեմատ չի աճել:

Հայաստանում և սահմանակից երկրներում գենդերային անհավասարության ինդեքսի և ենթաինդեքսների վերաբերյալ համեմատական տվյալները ներկայացված են Աղյուսակ 3-ում:

Աղյուսակ 3. ՀԳԱ ինդեքսը և ենթաինդեքսները Հայաստանում և հարևան երկրներում, 2026թ.

Ցուցանիշ	Երկիր	Հայաստան	Վրաստան	Ադրբեջան	Թուրքիա	Իրան
ՀԱՄԱՇԽԱՐՀԱՅԻՆ ԳԵՆԴԵՐԱՅԻՆ ԱՆՀԱՎԱՍԱՐՈՒԹՅՈՒՆ	Ինդեքս, %	73.1	72.7	69.7	64.9	58.5
	Դիրք	58	60	98	126	144
• Տնտեսական մասնակցություն և հնարավորություններ	Ինդեքս, %	65.2	71.9	77.3	52.5	35.1
	Դիրք	110	60	22	130	145
• Կրթության ձեռքբերում	Ինդեքս, %	98.2	98.6	99.3	98.7	98.4
	Դիրք	99	94	73	93	96
• Առողջություն և կյանքի տևողություն	Ինդեքս, %	96.5	97.5	93.9	96.8	96.1
	Դիրք	95	37	145	81	117
• Քաղաքական մասնակցություն	Ինդեքս, %	32.4	22.6	8.1	11.8	4.6
	Դիրք	42	70	127	117	139

Աղյուսակից երևում է, որ գենդերային անհավասարության ինդեքսով Հայաստանը 2026-ին ևս գերազանցում է բոլոր սահմանակից (հարևան) երկրներին: Այնուամենայնիվ, հարկ է ընդգծել, որ **ՀԳԱ ինդեքսի չորս ենթաինդեքսներից Հայաստանն առաջատար է միայն մեկի՝ «Քաղաքական մասնակցություն» ենթաինդեքսի գծով: Այսինքն՝ ՀԳԱ ինդեքսի գծով հարևանների համեմատ Հայաստանի գերակա վարկանիշային դիրքը հիմնականում ապահովվել է քաղաքական մասնակցության ենթաինդեքսի՝ օրենսդրորեն ամրագրված քվոտավորման շնորհիվ:**

Հայաստանի չորս հարևաններից ամենամեծ ՀԳԱ ինդեքսը՝ 72.7%, ունի համաշխարհային վարկանիշային աղյուսակում 60-րդ հորիզոնականը զբաղեցնող Վրաստանը: Երկրորդն 98-րդ հորիզոնականը զբաղեցնող Ադրբեջանն է՝ 69.7% ինդեքսով: Հաջորդը 126-րդ հորիզոնականում գտնվող Թուրքիան է՝ 64.9% ինդեքսով: Վերջինն Իրանն է (58.5%, 144-րդ հորիզոնական):

«Տնտեսական մասնակցություն և հնարավորություններ» ենթաինդեքսի գծով Հայաստանն իր երկու հարավկովկասյան հարևաններին էլ (Ադրբեջանին և Վրաստանին) զիջում է (համապատասխանաբար 12.1 և 6.7 տոկոսային կետով):

«Կրթության ձեռքբերում» ենթաինդեքսի գծով վերջին ժամանակահատվածում արձանագրված անկման պատճառով Հայաստանը զիջում է իր բոլոր չորս հարևաններին:

«Առողջություն և կյանքի տևողություն» ենթաինդեքսով Հայաստանից բարձր վարկանիշ ունեն Վրաստանը և Թուրքիան:

ԱՄՓՈՓՈՒՄ

Ամփոփելով նշենք.

- Հայաստանի գենդերային անհավասարության ինդեքսը 73.1% է և նախորդ տարվա համեմատ չի փոխվել: Ինդեքսի համաշխարհային վարկանիշային աղյուսակում Հայաստանը 58-րդն է:

Ինդեքսի **«Տնտեսական մասնակցություն և հնարավորություններ»** ենթաինդեքսի գծով այս տարի ևս Հայաստանը բավական լուրջ նահանջ է ունեցել՝ նախորդ տարվա համեմատ ենթաինդեքսը նվազել է 1.6 տոկոսային կետով, իսկ դրա գծով վարկանիշային դիրքը վատթարացել է 19 հորիզոնականով: Ընդ որում, այս ենթաինդեքսի գծով վատթարացումը վերջին տարիներին դարձել է «տխուր ավանդույթ»: Այն արդեն երեք տարի շարունակ նվազում է. այդ ընթացքում ենթաինդեքսի գծով ընդհանուր անկումը կազմում է 6.4 տոկոսային կետ, իսկ վարկանիշային դիրքի վատթարացումը 58 հորիզոնական է: Դա վկայում է տնտեսությունում խորացող գենդերային խտրականության և այս ուղղությամբ կառավարության անգործության կամ քաղաքականության անարդյունավետության մասին:

«Կրթության ձեռքբերում» ենթաինդեքսի 2026թ. արժեքը 0.2 տոկոսային կետով գերազանցում է 2025-ին նախորդ տարվա համեմատ նվազած արժեքին: Նախորդ տարիներին այս ենթաինդեքսը մշտապես բարձր է եղել:

Զեկույցի տվյալները վկայում են, որ Հայաստանում կանանց կրթական/մասնագիտական ներուժի և դրա տնտեսական իրացման (ռեալիզացիայի) միջև խզումը չափազանց մեծ է: Կանանց կրթական/մասնագիտական ներուժի առումով Հայաստանն առաջատար երկրների թվում է: Մասնավորապես, «բարձրագույն կրթության համակարգում ընդգրկվածություն» և «մասնագիտական և տեխնիկական աշխատանքներում զբաղվածություն» ցուցիչների գծով մեր երկիրը զբաղեցնում է առաջին հորիզոնականն աշխարհում: **Մինչդեռ եկամուտների բաշխման և ղեկավարման օղակներում կանանց ներգրավվածության առումով պատկերը չափազանց մտահոգիչ է:** «Վաստակած եկամուտ» ցուցիչով

Հայաստանը նույնիսկ հարյուրյակում չէ՝ 119-րդն է աշխարհում (տղամարդկանց տարեկան եկամուտը գրեթե կրկնակի գերազանցում է կանանց եկամուտին): Իսկ «օրենսդիր համակարգում, բարձրաստիճան և ղեկավար պաշտոններում զբաղվածություն» ցուցիչի համաձայն՝ կանայք զբաղեցնում են բարձրաստիճան և ղեկավար պաշտոնների ընդամենը 28.7%ը, այն էլ, ինչպես հայտնի է, զգալի չափով շնորհիվ խորհրդարանի պատգամավորության թեկնածուների սեռային հարաբերակցության օրենսդրորեն ամրագրված քվոտավորման:

Նույնիսկ «Տնտեսական մասնակցություն և հնարավորություններ» ենթաինդեքսի գծով արձանագրված բավական լուրջ նահանջի պայմաններում ՀԳԱ ինդեքսը նախորդ տարվա համեմատ մնացել է անփոփոխ: Իսկ դա զուտ այն պատճառով է, որ աճել են մյուս երեք ոչ տնտեսական բնույթի ենթաինդեքսները, դրանց թվում՝ հատկապես «Քաղաքական մասնակցություն» ենթաինդեքսը:

- Հայաստանը «Կենտրոնական Ասիա» տարածաշրջանի վարկանիշային աղյուսակի առաջատարն է:
- Զեկույցում ներառված՝ Եվրասիական տնտեսական միության (ԵԱՏՄ) անդամ չորս երկրների թվում Հայաստանը երկրորդն է՝ զիջելով միայն Բելառուսին: Ի դեպ, ԵԱՏՄ երկրներից միայն Հայաստանի ՀԳԱ ինդեքսը նախորդ տարվա համեմատ չի աճել:
- Գենդերային անհավասարության ինդեքսով Հայաստանը գերազանցում է բոլոր սահմանակից երկրներին, սակայն ՀԳԱ ինդեքսի չորս ենթաինդեքսներից միայն մեկի՝ «Քաղաքական մասնակցություն» ենթաինդեքսի գծով է առաջատար: Այսինքն՝ համաշխարհային գենդերային անհավասարության ինդեքսի գծով հարևանների համեմատ Հայաստանի առաջատար վարկանիշային դիրքը հիմնականում պայմանավորված է «Քաղաքական մասնակցություն» ենթաինդեքսով, որի բարձր լինելը զգալի չափով բացատրվում է վերը հիշատակված «սեռային քվոտավորմամբ»:

«Կրթության ձեռքբերում» ենթաինդեքսի գծով Հայաստանը 2026 թվականի զեկույցով զիջում է իր բոլոր չորս հարևաններին: Մինչդեռ, մինչև 2023 թվականը ներառյալ, Հայաստանն այս ենթաինդեքսով չէր զիջում հարևաններից ոչ մեկին: Ի դեպ, նախկինում Հայաստանում բազմիցս արձանագրվել է առավելագույն՝ 100%-անոց ցուցանիշ:

«Տնտեսական մասնակցություն և հնարավորություններ» ենթահինդեքսով Հայաստանը հարևաններից զիջում է Ադրբեջանին և Վրաստանին (համապատասխանաբար 12.1 և 6.7 տոկոսային կետով):

- 2026 թվականին համաշխարհային գենդերային անհավասարության ինդեքսը 69.2% է, որը նախորդ տարվա ցուցանիշից 0.4 տոկոսային կետով ավելի է: Զեկույցում նշված է, որ առաջընթացի ներկայիս դանդաղ տեմպերի պահպանման պարագայում համաշխարհային մակարդակով լիակատար գենդերային հավասարության հասնելու համար աշխարհից կպահանջվի ևս 120 տարի:
- Գենդերային անհավասարության ինդեքսի համաշխարհային վարկանիշային աղյուսակը 17 տարի անընդմեջ գլխավորում է Իսլանդիան, որի ինդեքսը 2026-ին կազմել է 93.0%: Վարկանիշային աղյուսակի ստորին՝ 145-րդ հորիզոնականում Չադն է՝ 57.8% ինդեքսով:

«ԼՈՒՅՍ հիմնադրամ» գրառմամբ հրապարակված նյութը պաշտպանված է ՀՀ օրենսդրությամբ և միջազգային համաձայնագրերով: Հրապարակված նյութի բոլոր իրավունքների բացառիկ իրավատերը **«ԼՈՒՅՍ»** հիմնադրամն է:

Նյութի ամբողջական կամ դրանից քաղվածքների վերարտադրումը թույլատրվում է իրականացնել միայն **«ԼՈՒՅՍ հիմնադրամ»** գրառման և համապատասխան **ակտիվ հղման** տեղադրման պայմանով՝ պահպանելով «ԼՈՒՅՍ» հիմնադրամին պատկանող նյութերի օգտագործման կարգը: